



Bruno Ludolphi Ducis Saxonie filius, & patruus Henrici Aucupis Regis Rom. in sine nomen reliquit vico, quem ille primus inchoauerat, qui ex illo dictus est Brunonis vicus, aut potius finis, qui lingua Saxonum vocatur VVijk, hodie tamen communiter appellatur Brunsvich (renui in asperam mutata, cuius etiam paulo ante mentionem fecimus in Hafsia.) Est autem vrbs ea Ducatus Brunsvicensis metropolis, qui ab ea nomen quoque suum adeptus est, & magna admodum, populosa, moenibus ac fossis munitissima, turribus ac propugnaculis firmata, decorata magnificis domibus, prepolitus plateis, amplis & ornatissimis templis, per quadrum tantum ferè habet longitudinis quantum latitudinis, complectiturq; in suo ambitu duo millia passuum. Est aliquanto maior Noriberga, & minor Erphordia. Ad Orientem habet dioecesim Magdeburgensem, ad Meridiem Hartonicum seu Hercinium nemus: occidentem partem comprehendit Hildesheimensis episcopatus, & Septentrionem inhabitant Lunaburgenses. Hanc urbem perlabitur Ornaca amnis, cui origo sylua est Hartonica; duasque in partes ciuitatem scindit, omnem secum trahens immundiciem, varijs vndique pontibus cooperatus. Tota vrbs in plano sedet, moenibus ac fossa duplici profundissima & aliquot in locis triplici, ac qualibet aquis stagnante munita. Vallum etiam inter fossas crassissimum ductum per circuitum, varijs arborum confitum generibus. non habet ciuitas aquam potabilem, sed communiter bibunt cereuisiam, Vini autem vsus charior est & rarior. Inter ceteras Ducatus huius ciuitates haud potestrema quoque erit Goslaria, quam Henricus I. pater magni Ottonis, urbium amator in formam ciuitatis erexit. Anno 1051. Imperator Henricus 3. ingentibus regni florens opibus, urbem istam mirifice ornauit, quam de paruo molendino, vt aiunt, vel tugurio venatorio duo priores Henrici, & iste nunc tertius in tam magnam sicut hodie cerni potest urbem bono prouexerunt auspicio, in qua regale palatium hic Imperator magnifice extruxit, & duas omnipotenti Deo congregationes instituit. Dicitur Otto I. Imp. apud Goslariam argenti inuenisse mineras, quarum magni fuerunt redditus, ex quibus Imp. duo constraxit sacerdotum collegia, & regium palatium nobilis operis. Ab uterque autem ciuibus suppeditatis diuitijs, offensus Deus permisit puteum vnum corrui, quo casu mille homines & supra oppressi fuerunt. Et post illud tempus neque argentum neque aurum fuit amplius inuentum in eo loco sed plumbum nigrum. Perhibent autem metallum Goslariae sic natum: Quidam nobilis homo equum cui nomen erat Ramelus, in monte ad ramum arboris alligauit. Is vngulis quibus ferreae soleae inductae, terram quatit, verrit, atque ita reconditam plumbi nigri venam integumentis nudauit, non aliter ac Pegasus alatus aperuit fontem dum vngula ferit saxum, vt autem fons iste ex eo vocatur Hippocrene, ita montem incolae Ramelum vocarunt, qui hodie maxime florere, atque admirabilem plumbi copiam suppeditat, Goslariae tantum inuenitur galena & pyritarum, ex quibus plumbum nigrum excoquitur, vt mons quidam ferè nihil nisi galena & pyritae esse videatur. Ducatus huic vicinus & Halberstadiensis Episcopatus, itidem à metropoli eiusdem in eo nominis sic dictus. Perlabitur autem urbem Halberstadium Oltemia fluius. in medio verò tumulus assurgit, in cuius cacumine planities est, duorum ferme stadiorum continens longitudinem, in cuius extremis angulis duo templa sita sunt, quorum alterum pontificale est. In medio late patet forum, magnificis canonicorum aedibus vndique circum: & haec pars vrbs vocatur. Quod sub tumulo iacet, suburbium appellant. In monte nulla laicorum, vt vocant, habitatio. Carolus Magnus huius Ecclesiae fundator habetur. Est circa hanc ciuitatem ager optimus, ferax tritici. Maturefcentibus frugibus, culmorum altitudinem equo insidentem hominem ferunt excedere. Magdeburgum fuit olim huius episcopatus Parochia; sed per Ottonem primum ibi Archiepiscopatus est erectus, & Halberstadiensis dioecesis minorata. Fuit episcopatus hic primus à Carolo in loco Salingstede fundatus, qui hodie Ostervijck appellatur, & deinde in Halberstadium translatus.



BRUNSWICK
DVCATVS
HILDESHEIM
EPISCOP:
HALBERSTAT
EPISCOP:
cum caeteris adiunctis
1593

Missa Germania cuncta

MERIDIES

